

SOLOMON ENA ANE

- ¹ Ane Herea-daena, Solomon ena.
- ² Udumu haherahuna amo boma harahugu,
badina be emu uraheni ese vine ranuna e
hereaiamu.
- ³ Emu hedahu muramuradia bonadia na nanamo
heherea;
oi ladamu na dehero e seiamu na heto.
Una dainai ulato ese e ura henimumu.
- ⁴ Murimu ai a verigu kau! Aitala haraḡa;
hanua pavapavana ese ena ruma ai vada e
hakaugu vareai.
Baia heatolaimu, baia moalelaimu;
emu uraheni baia imodaia bada, vine ranuna
baia imodaia maraḡi.
Mai badina idia ese e ura henimumu.
- ⁵ Ierusalem kekenimui e,
kopigu na korema-korema, to ita-itagu na
namo,
Kedara dabua rumadia na heheto,
Solomon ena seseahu na heheto.
- ⁶ Kopigu na korema-korema dainai basio raraigu;
badina be dina ese vada e raragu.
Taihugu ese e badu heniguva,
vine imeadia iregudia ai e halaogu;
a lauegu imea na asina reḡua.
- ⁷ Egu lalokau taumu e, ba hadibagu,
emu mamoe na edeseni ai o ubudiamu?

Dina tubua ai edeseni ai o hahekurediamu?
 Bamomu edia seri badidiai baina loa eva-eva
 anina be dahaka?

⁸ Hane namo e, bema asi dibamu,
 mamoe vatagadia ba *gavadia*;
 emu nani natudia na mamoe iregudia taudia
 edia kalaga badidiai ba ubudia.

⁹ Egu lalokau e, Farao ena kariota hosina ta ida
 aina hahegeregeremu.
¹⁰ Vahamu mai heraheradia ita-itadia na nanamo
 heherea,
 bona aiomu mai agevana danu.
¹¹ Ihaheralaimu *g*audia baia kara,
gold heraheradia mai *silver*-dia.

¹² Hanua pavapavana na e ege dihova negana ai,
 egu muramura bonana namona e daeva.
¹³ Egu lalokau na muro* modana ta,
 ratagu padadiai e miamu.
¹⁴ Egu lalokau na kofere† buredia idabubuna ta,
 En-gedi vine-imeadia ai.

¹⁵ Egu lalokau e, oi na hane namo,
 momokani, oi na hane namo.
 Matamu na pune.

* **1:13:** “Muro” na Heberu taudia edia muramura mai bonana ta.

† **1:14:** “Kofere” na Heberu taudia edia muramura avana ta.

16 Egu lalokau e, oi na raho namo taumu;
 momokani, oi na mai hairaimu.
 Eda mahuta patana na gadoka-gadoka,
 17 eda ruma audia na sida,
 eda ruma toidaedia na beroso[†] audia.

2

1 Lau na Saron vahuvahuna,
 koura ai e varamu sosanana.*

2 Ulato bogaragidiai egu lalokau na
 sosana burena siniura bogaragidiai na heto.

3 U hau bogaragidiai egu lalokau na
 apolo auna uda audia bogaragidiai na heto.
 Ia ikerukeruna ai na helai mai moale-badagu ida;
 huahuana na mai gaihona udugu ai.

4 Aria rumana ai e hakaugu lao;
 ena pepe lau daegu ai na lalokau.

5 Vine huahuadia kakorodia amo ba ubugu,
 apolo huahuadia amo ba hagogadagu,
 badina be uraheni ese e hamasegumu.

6 Imana laurina amo bema hahekwinagu,
 imana idibana amo bema rosigu.

7 Ierusalem kekenimui e, na haḡanimuimu,
 uda nanidia bona dia daidiai,

[†] 1:17: “Beroso” na au ta ladana, Heberu gado ai.
 “Sosana” na Heberu taudia edia herahera avana ta.

* 2:1:

uraheni na basio haoa
ela bona sibona baine noga.

⁸ Egu lalokau tauna gadona!
A itaia, ia na e maimu;
ororo badadia ai e roho daemu,
ororo maraġidia ai e roho laomu.

⁹ Egu lalokau tauna na uda nanina
eiava dia natuna na heto.

A itaia, emai ruma murimurinai e ginimu,
gaba-mauruna amo e ha-igomu,
makamaka amo e igo vareaimu.

¹⁰ Egu lalokau tauna ese e hereva henigumu,
ini e gwau tomamu:

Egu lalokau e, a tore isi!
Hane namo e, aitala!

¹¹ Keru negana vada e ore;
medu vada e doko.

¹² Tano heraheradia vada e tubu;
ane-abi negana vada e kau;
bona pune na e taimu eda tano ai.

¹³ Suke huahuadia e dobimu,
vine buredia e papamu,
bonadia na e daemu.

Egu lalokau e, a tore isi!
Hane namo e, aitala!

¹⁴ Egu pune e, oi na nadi matudia ai;
oi na haga kohuadia ai.

Vairamu bama itaia,
bona gadomu bama kamoni;
badina be gadomu na namo,

bona vairamu na mai hairaina.

15 Aoma, mariboi baita idoadia,
 ena be mamaragi to
 idia ese vine imeadia e hadikamu,
 badina na eda vine buredia e papamu.

16 Ia na egu lalokau, lau be ena lalokau;
 ia ese ena mamoe e ubudiamu, sosana boga-
 ragidiai.

17 Egu lalokau taumu e, a kerehai,
 uda nanina eiava dia natuna
 ororo gabaedia ai na heto;
 ela bona dina baine keruma,
 bona hanua baine boi.

3

1 Hanuaboi ai, egu mahuta patana ai,
 egu lalokau tauna na tahua;
 na tahua, to asina davarua,
 na boiria, to ia na se haere.

2 Aina tore isi, hanua ai baina loa eva-eva,
 ariara ai bona noho-bou gabudia ai
 egu lalokau tauna baina tahua.
 Na tahua, to asina davarua.

3 Gima taudia ese e davarigu,
 hanua ai e loa eva-evava ai;
 na tai henidia, nato
 “Egu lalokau tauna so itaia a?”

4 Na rakatanidia, bena asi vanahana

egu lalokau tauna na davaria.
 Na dogoa tao, asina kahua nege,
 ema bona sinagu ena ruma ai,
 e havaragu hahinena ena daiutu ai,
 na hakaua dae.

⁵ Ierusalem kekenimui e, na haḡanimuimu,
 uda nanidia bona dia daidiai,
 uraheni na basio haoa
 ela bona sibona baine noga.

⁶ Una na dahaka, tano ḡaḡaena amo e maimu,
 kwalahu dubuna na heto,
 mai bonana, muro bona lebona*
 bona hoihoi tauna ena muramura mai bona-
 dia ibouboudiai?

⁷ A itaia, Solomon ena ivitoto,
 goada taudia tauratoi-ahui ese e ginia
 heḡeḡemu!

⁸ Idia na Israel ena goada taudia,
 iboudiai na mai daredia gabadia ai.
 Tuari na mai dibadia;
 ta ta edia dare na koekoedia ai;
 hanuaboi ena hahegari ḡaudia ilao-ahudia.

⁹ King Solomon ena laolao kalagana na
 Lebanon audia amo e karaia.

¹⁰ Aena na *silver*, tabekau kahana na *gold*;
 helai ḡauna iḡovana na dabua kakakakana.
 Laloma kahana na e haheraia ḡoevaḡoeva,

* **3:6:** “Muro” bona “lebona” na Heberu taudia edia muramura mai bonadia ladadia.

Ierusalem kekenidia ese.

11 Siona kekenimui e, a raka lasi;
 King Solomon ba itaia.
 Ena havava ġauna be kwarana ai;
 ena headava dinana ai,
 lalona e moaleva dinana ai,
 sinana ese ia kwarana e havavalaia.

4

1 Egu lalokau e, oi na hane namo;
 momokani, oi na hane namo.
 Matamu na pune,
 vairamu iġovalaina dabuana murinai.
 Huimu na nani serina,
 Gilead ororona amo e hekei dihomu na heto.
 2 Isemu na mamoe serina huidia vada e utu
 bena digu gabuna amo e daemu na heto;
 iboudiai na mai natudia vara-hekapa,
 ta se raka edeamu.
 3 Udumu bibinadia na varo kakakakadia na
 heheto;
 udumu na mai hairaina.
 Vahamu ruaosi na rimono* huahuana e ivaia
 parara na heto,
 vairamu iġovalaina dabuana murinai.
 4 Aiomu na David ena kohoro na heto,
 ena tuari ġaudia e haboumu gabuna;
 unuseni ai kesi daha-ta hetau dadae,
 iboudiai na tuari taudia edia kesi.

* 4:3: “Rimono” na Heberu taudia edia au huahua ta.

⁵ Ratamu ruaosi na uda nanidia natudia rua na
 heheto,
 uda nanina hahinena natuna vara-hekapa,
 sosana bogaragidiai e anianimu gāudia.

⁶ Lau na muro ororona bainala,
 lebona[†] ororona baina lao henia,
 ela bona dina baine keruma,
 bona hanua baine boi.

⁷ Egu lalokau e, oi na hane namo;
 oi na asi bebefa-bebekamu.

⁸ Adavagu e, Lebanon amo baita raka hebou,
 Lebanon amo baita raka hebou.
 Amana bona Seniri bona Heremon ororodia
 doridia,
 bona leona edia kohua bona taiga edia ororo,
 ba rakatanidia.

⁹ Taihugu e, adavagu e,
 lalogu vada o hamanokaia.
 Matamu ena halari tamona ai,
 aiomu agevana ena herahera nadina tamona
 ai,
 lalogu vada o hamanokaia.

¹⁰ Taihugu e adavagu e,
 emu uraheni na daka gaiho!

Emu uraheni ese vine ranuna e hereaiamu,
 emu dehoru bonana ese muramura iboudiai
 bonadia e hereadiamu.

[†] **4:6:** “Muro” bona “lebona” na Heberu taudia edia muramura
 mai bonadia ladadia.

11 Adavagu e, bada-ranuna na udumu bibinadia
 amo e hetuturumu,
 bada-ranuna bona rata na malamau henunai;
 emu dabua bonadia na
 Lebanon bonana na heto.

12 Taihugu, adavagu, na e hekou kunuka-kunuka
 umana;
 e hekou kunuka-kunuka umana,
 e hekou ahu ranuna.

13 Emu uma ai e varamu gaudia na
 rimono[†] audia mai huahua herea-daedia,
 bona kofere bona neredede;

14 oibe, neredede bona karakomo,
 bona kane bona kinamomo,
 bona lebona audia iboudiai;

bona muro bona aloe,[§]
 bona muramura hereadia iboudiai.

15 Hari uma na mai ranu-lohilohi gabuna,
 bona mai mauri-ranuna gurina,
 bona mai sinavai-sinavaina,
 Lebanon amo e arumu.

16 Lai mirigini e, a noga!
 Diho e, a toa! Egu uma ba toa henia,
 ena muramura bonadia ba oda rohoroholai.
 Egu lalokau tauna na ena uma ai baine raka
 vareai
 ena huahua herea-daedia baine ani.

[†] 4:13: "Rimono" na Heberu taudia edia au huahua ta. § 4:14:
 Kofere; neredede; karakomo; kane; kinamomo; lebona; muro; aloe.
 Ini na Heberu taudia edia muramura mai bonadia haida ladadia.

5

1 Tadigu e, adavagu e,
 egu uma lalonai na raka vareaimu.
 Egu muro bona egu muramura mai bonadia na
 haboudiamu;
 bada mai ranuna ida na aniamu,
 egu vine ranuna bona egu rata na inumu.

O hetura hehenimu taumui e,
 bavaniani, vine ranuna ba inua.
 O helalokau hehenimu taumui e,
 ba inuinu, ba inu momo.

2 Na mahuta, to lalogu be noga;
 A kamonai, egu lalokau tauna e pidipidimu.

Taihugu e, egu lalokau,
 egu pune, oi na ġoeva-dae!
 Iduaragu ba kehoa.
 Badina be hunu ese kwaragu vada e hapariparia,
 hanuaboi hununa ese huigu vada e hapari-
 paria.

3 A lau be dabua vada na dokia oho,
 ma ede baina dokia lou toma?
 Aegu vada na huridia,
 ma ede baina hamirodia lou toma?

4 Egu lalokau tauna imana na iduara ikouna ai e
 daukau,
 bena kudougu e hetaha.

5 Lau na tore isi,
 egu lalokau tauna iduarana baina kehoa.
 Muro na imagu amo e hetuturu,
 muro ranuna na imagu kwakikwakidia amo
 e hetuturu dobi,
 iduarara ikoulaina auna ai.

6 Egu lalokau tauna iduarana na kehoa;
 to egu lalokau vada e raka oho, ia na lasihia.
 E hereva negana ai laumagu na e daure,
 a na tahua negana ai asina davaria,
 bona na boi henia negana ai ia na se haere.

7 Gima taudia ese e davarigu,
 hanua ai e loa eva-eva ai;
 idia ese e dadabagu bona e haberogu,
 egu hetaru e abihaigu,
 maḡu igimana taudia ese.

8 Ierusalem kekenimui e, na haḡanimuimu,
 egu lalokau tauna boma davaria, boma
 hamaoroa,
 uraheni ese e hamasegumu.

9 Hane namo e,
 emu lalokau tauna ede e herea tomamu?
 Ede e herea tomamu dainai
 bena ini o haḡanimai tomamu?

10 Egu lalokau tauna kopina na ḡoevaḡoeva bona
 kakakaka,
 gerebu-ta bogaragidiai ia mo sibona herea.

11 Kwarana na *gold* namo-hereana;

- ia na hui-tuma, bona huina na korema-
korema,
galo huina na heto.
- 12 Matana na ranu badidia ai e nohomu punedia
na heheto,
rata ai e huridiamu, e heato goevadaemu.
- 13 Vahana na muramura avadia umadia na
heheto,
mai bonadia.
- Bibinana na sosana,
muro* ranuna na idia amo e vevemu.
- 14 Imana na *gold*, e hakuboroa hegege gauna,
mai herahera nadidia ida.
- Tauna na aivori,
mai sapairo† nadidia ida.
- 15 Aena na bauka-bauka, nadi kurokurona na
heto;
hehedaikau *gold*-na ai e hadaidia kau.
- Ita-itana na Lebanon na heto;
hairaina na Lebanon sidadia na heheto.
- 16 Ena hereva na gaiho herea;
lau na ura henia lalo-dikamu.
- Ierusalem kekenimui e, egu lalokau bunai,
bona turagu bunai.

6

- 1 Hane namo e,
emu lalokau tauna na ede ela?
Emu lalokau tauna na ede kaha ai vada e raka
siri?
Edeseni ai baita tahua?

* **5:13:** “Sosana” na Heberu taudia edia herahera avana ta.
“Muro” na edia muramura mai honana ta. † **5:14:** “Aivori” na
eiefant doana. “Sapairo” na Heberu taudia edia nadi hururu-hu-
ruruna ta ladana.

² Egu lalokau na ena uma vada ela,
 ena muramura avadia umana.
 Uma ai ena mamoe baine ubudia,
 bona sosana heraheradia baine haboudia.

³ Ia na egu lalokau, lau be ena lalokau;
 ia ese ena mamoe e ubudiamu,
 sosana* bogaragidiai.

⁴ Egu lalokau e, oi na mai hairaimu, Tirisa na
 heto;
 hairaimu na herea, Ierusalem na heto;
 itamu na mai garina, tuari oreana mai pepena na
 heto.

⁵ Asio raraigu, badina be matamu ese e
 hamanoka-manokagumu.

Huimu na nani serina
 Gilead ororona amo e hekei dihomu na heto.

⁶ Isemu na mamoe serina
 digu gabuna amo e daemu na heto;
 iboudia na mai natudia vara-hekapa,
 ta se raka edeamu.

⁷ Vahamu ruaosi na rimono† huahuana e ivaia
 parara na heto,
 Vairamu iğovalaina dabuana murinai.

⁸ Lohia hahinedia na tauratoi-ahui,
 hesiai hahinedia na taurahani-ahui,

* **6:3:** “Sosana” na Heberu taudia edia herahera avana ta. † **6:7:**
 “Rimono” na Heberu taudia edia au huahua ta.

- ulato na asi iduahidia.
 9 Egu pune na *gōeva-dae*, ia mo sibosibona;
 ia na sinana ena lalokau,
 e havaraia hahinena natuna herea-daena.
 Ulato ese e itaia, bena e hanamoa;
 lohia hahinedia bona hesiai hahinedia ese e
 itaia,
 bena e imodaia.
 10 Ina be daika, ita-itana na daba e reremu na
 heto?
 Mai hairaina hua na heto?
 Mai diaridiarina dina na heto?
 Itana na mai garina, tuari oreana mai pepena
 na heto, ani?

- 11 Okari imeana na lao henia,
 koura heraheradia baina itadia;
 baina itaia, vine vada e tubu eiava;
 baina diba, rimono[†] vada e kobo eiava.
 12 Asi vanahana na mata hanai: lau na kariota ai,
 egu lohia tauna badibadinai nato.

- 13 Sulama kekenina e, a lou mai, a lou mai;
 baina raraimu tao, a lou mai, a lou mai.

Badina be dahaka Sulama kekenina ba raraia,
 Mahanaim mavaruna boma raraia na heto?

7

- 1 Lohia kekenimu e,

[†] **6:11:** “Rimono” na Heberu taudia edia au huahua ta.

emu mai tamakadia ida be daka hairai!
Mamumu bauka-baukadia na herahera nadidia
na heheto,

karakara tauna namona ese e kara.

² Hudomu na kehere kuboruna na heto,
vine ranuna ai e honu hanaihanaimu.

Bogamu na uit isenuna ta,
sosana* ese e hahegegea daemu.

³ Ratamu ruaosi na uda nanidia natudia rua na
heheto,
uda nanina natuna vara-hekapa.

⁴ Aiomu na kohoro na heto,
aivori† amo e hadaia gauna.

Matamu na Hesebon gohugohudia,
Batarabim ikoukouna badibadinai.

Udu-baubaumu na Lebanon kohorona na heto,
Damasko roha-hekeina.

⁵ Kwaramu na mai hairaina, Karamele ororona
na heto;
bona huimu heveriveridia na varo
kakakakadia na heheto,
hanua pavapavana na huimu ai vada e heau
kau.

⁶ Lalokau e, moale ihavarana kekenimu,
oi na hane namo, oi na mai hairaimu.

⁷ Emu lata na buatau auna na heto,
bona ratamu na buatau takodia na heheto.

⁸ Lau na tomu, Buatau auna baina dae,
bona takona baina abidia.

Ratamu na vine takodia ida bae hegeregere,

* **7:2:** “Sosana” na Heberu taudia edia herahera avana ta. † **7:4:**
“Aivori” na elefant doana.

udumu bonana na apolo bonadia
hegeregeredia.

⁹ Emu haherahu na vine ranuna namo-hereana
na heto,

i'inuna na mai gaihona,
bibinagu ai bona isegu ai.

¹⁰ Lau na egu lalokau tauna ena;
ia ese e ura henigumu.

¹¹ Egu lalokau e, aoma!
aita raka lasi tano paka ai,
hanua maragidia ai baita noho;

¹² daba ai vine imeadia baitala,
baita itaia, vine vada e kobo dae eiava,
baita diba, buredia vada e papa eiava,
baita tahua, rimono[†] vada e tubu eiava lasi.
Unuseni ai baina ura henimu.

¹³ Dudai[§] bonadia na e daemu,
emai iduara daediai na huahua namo-
hereadia idau-idau,
matamatadia bona gunadia,
vada na haboudia oiemu,
egu lalokau e!

8

¹ Bema oi na lau taihugu,
sinagu ratana e inuava tauna,
ariara ai baitama hedavari bena bama
harahumu,

[†] **7:12:** “Rimono” na Heheru taudia edia au huahua ta. **§ 7:13:**
“Dudai” na Heheru taudia edia muramura avana ta.

bona ta ese basinema ihi-ihiraigu.

² Sinagu ena ruma ai,
 e havaragu hahinena ena daiutu ai,
 bama hakaumu vareai.
 Vine ranuna mai muramurana bama henimu,
 egu rimono ranuna bama ha-inulaimu.

³ Imana laurina amo bema hahekwinagu,
 imana idibana amo bema rosigu.

⁴ Ierusalem kekenimui e, na haḡanimuimu,
 uraheni na basio haoa,
 ela bona sibona baine noga.

⁵ Una na daika, tano ḡaḡaena amo e maimu,
 ena lalokau tauna enai e tabe kaumu?

Apolo auna henunai na haomu;
 unuseni ai sinamu e hekamonaiva,
 unuseni ai e havaramu hahinena na hisi e
 aniva.

⁶ Toagu avatoa lalomu ai,
 toagu avatoa imamu ai.
 Lalokau ena goada na mase ena goada
 heḡereḡerena,
 bona mama ena daḡedaḡe na mase gabuna
 ena daḡedaḡe heḡereḡerena;
 ena ḡaraḡara na lahi ḡaraḡarana na heto,
 ena siahu na lahi hururu-hururuna siahuna
 na heto.

⁷ Ranu momo ese lalokau basie habodoa diba;
 utu-utu badadia ese basie utua dae diba.

Tau ta ese ena taḡa idoinai bema heni dudu kau,
 lalokau davana,
 to basinema heḡereḡere;
 bema dadaraia vaitani.

⁸ Tadimai ta do aṣi ratana.
 Tadimai ede baia durua toma,
 tau ta ese baine herevalaia negana ai?
⁹ Ia na bema magu, *silver* amo baia ha-aukaia;
 bema iduara, sida reireidia amo baia koua
 ahu.

¹⁰ Lau na maḡu, ratagu na kohoro na heto;
 e herevalaigu tauna vairanai
 lau na maino imailaina.

¹¹ Solomon ena vine imeana ta be Baal-hamono
 ai;
 ia ese imea ireguna taudia e habadinalaidia.
 Ta ta *silver* monidia daha-ta daha-ta e heni,
 imea anina davana.

¹² Solomon e, oiemu daha-ta bavabia;
 vine ireḡuna taudia edia sinahu-rua bae abi
 danu.
 A lauegu vine imeana na lauegu korikori,
 lau sibogu egu.

¹³ Imea ai o nohomu taumu e,
 bamogu na e hakalamu, gadomu ikamonaina
 totona;
 lau danu eremu bama kamoni.

14 Egu lalokau e, aoma haraḡa,
uda nanina eiava dia natuna
muramura orordia ai na heto.

Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2